

საქართველოს კანონი

საქართველოს სისხლის სამართლის საპროცესო კოდექსში ცვლილების შეტანის შესახებ

მუხლი 1. საქართველოს სისხლის სამართლის საპროცესო კოდექსში (საქართველოს საკანონმდებლო მაცნე, №31, 03.11.2009, მუხ. 190) შეტანილ იქნეს შემდეგი ცვლილება:

1. მე-3 მუხლს დაემატოს შემდეგი შინაარსის 22² ნაწილი:

„22². დაზარალებულის კომპენსაცია - დანაშაულის ჩადენის შედეგად დაზარალებული ფიზიკური ან იურიდიული პირისთვის პირდაპირ მიყენებული ქონებრივი ზიანის ანაზღაურება ამ კოდექსით დადგენილი წესით.“;

2. 57-ე მუხლის პირველ ნაწილს დაემატოს შემდეგი შინაარსის „გ¹“ ქვეპუნქტი:

„გ¹) მიიღოს დაზარალებულის კომპენსაცია ამ კოდექსით დადგენილი წესით;“;

3. 143³ მუხლის მე-2 ნაწილის „ა“ ქვეპუნქტი ჩამოყალიბდეს შემდეგი რედაქციით:

„ა) გამოძიება დაწყებულია ან/და სისხლისსამართლებრივი დევნა ხორციელდება განზრახი მძიმე დანაშაულის ან/და განსაკუთრებით მძიმე დანაშაულის ან საქართველოს სისხლის სამართლის კოდექსის შემდეგი მუხლებითა და თავით გათვალისწინებული რომელიმე დანაშაულის გამო: 134-ე მუხლი, 139-ე მუხლის პირველი ნაწილი, 142-ე მუხლი, 142¹ მუხლის პირველი და მე-2 ნაწილები, 143-ე მუხლის პირველი ნაწილი, 143³ მუხლის პირველი ნაწილი, 144² და 155-ე მუხლები, 180-ე მუხლის პირველი ნაწილი, 181-ე მუხლის პირველი ნაწილი, 186-ე მუხლის მე-2 ნაწილი, 187-ე მუხლის მე-2 ნაწილი, 192-ე მუხლი, 198-ე მუხლის პირველი ნაწილი, 210-ე მუხლის პირველი ნაწილი, 223-ე მუხლის მე-3 და მე-6 ნაწილები, 223³ მუხლის პირველი ნაწილი, 226-ე, 235-ე, 239¹ და 252-ე მუხლები, 253-ე მუხლის პირველი ნაწილი, 254-ე მუხლის პირველი და მე-2 ნაწილები, 259⁴ მუხლი, 262-ე მუხლის 1¹ ნაწილი, 263-ე მუხლის პირველი ნაწილი, 284-ე მუხლის პირველი და მე-2 ნაწილები, 285-ე მუხლის პირველი ნაწილი, 286-ე მუხლის პირველი-მე-3 ნაწილები, 286¹ მუხლის პირველი ნაწილი, 286² მუხლის პირველი ნაწილი, 287-ე მუხლი, 288-ე მუხლის პირველი და მე-2 ნაწილები, 289-ე, 290-ე და 292-ე-302-ე მუხლები, 303-ე მუხლის პირველი-მე-3 ნაწილები, 304-ე მუხლის პირველი ნაწილი, 305-ე-306¹ და 317-ე მუხლები, 318-ე მუხლის პირველი

ნაწილი, 320-ე მუხლის პირველი ნაწილი, 321-ე მუხლის პირველი ნაწილი, 322¹ მუხლი, 322² მუხლის პირველი ნაწილი, 330¹ მუხლის პირველი ნაწილი, 331² მუხლი, XXXIX თავი, 343-ე, 343¹ და 344-ე მუხლები, 344¹ მუხლის პირველი ნაწილი, 344² მუხლის პირველი ნაწილი, 345-ე მუხლის პირველი ნაწილი, 381² მუხლი და 405-ე მუხლი;“;

4. 151-ე მუხლს დაემატოს შემდეგი შინაარსის 3² ნაწილი:

„3². დაზარალებულის კომპენსაციის გადახდის უზრუნველყოფის მიზნით ბრალდების მხარის შუამდგომლობის საფუძველზე სასამართლოს მიერ მიღებული ქონებაზე ყადაღის დადების შესახებ განჩინებით ყადაღა ასევე ედება ამ კოდექსის XVII¹ თავით გათვალისწინებულ ქონებას.“;

5. კოდექსს დაემატოს შემდეგი შინაარსის 158¹-158⁴ მუხლები:

„მუხლი 158¹. დაყადაღებული ქონების მიზნობრივი განკარგვა

1. პირი, რომლის საკუთრებაშია დაყადაღებული ქონება (შემდგომში - ქონების მესაკუთრე), დანაშაულის შედეგად მიყენებული ზიანის ანაზღაურების მიზნით, უფლებამოსილია, საქმის წარმოების ნებისმიერ ეტაპზე, მიმართოს პროკურორს და ითხოვოს დაყადაღებული ქონების სრულად ან ნაწილობრივ მიზნობრივი განკარგვა. მიზნობრივი განკარგვა შესაძლებელია განხორციელდეს როგორც ყადაღის ობიექტის, ასევე პირის მიერ მისი მიზნობრივი რეალიზაციის შედეგად მიღებული თანხის გადაცემის ფორმით.

2. სუბიექტის საბანკო/ელექტრონულ ანგარიშზე ყადაღის დადების შემთხვევაში, ზიანის ანაზღაურების ან სხვა მოტივირებული საფუძველით, ანგარიშის მესაკუთრე უფლებამოსილია მიმართოს პროკურორს და ითხოვოს საბანკო ანგარიშზე არსებული ნაშთის სრულად ან ნაწილობრივ მიზნობრივი განკარგვა.

3. პროკურორს, ქონების მესაკუთრესა და მის ადვოკატს შორის, წერილობითი ფორმით გაფორმებული თანხმობის დოკუმენტის საფუძველზე, პროკურორი უფლებამოსილია მიმართოს სასამართლოს შუამდგომლობით დაყადაღებული ქონების სრულად ან ნაწილობრივ მიზნობრივი განკარგვის თაობაზე. აგრეთვე, შუამდგომლობით დაყადაღებულ საბანკო ანგარიშზე არსებული ფულადი ნაშთის სრულად ან ნაწილობრივ მიზნობრივი განკარგვის თაობაზე.

4. თანხმობის შესახებ დგება ოქმი (ქონების მიზნობრივი განკარგვის ოქმი), რომელშიც ასახულია ქონების მესაკუთრეს (საბანკო ანგარიშის განმკარგავ პირს) და პროკურორს შორის მოლაპარაკების პროცესი. ოქმის ასლი გადაეცემა ქონების მესაკუთრეს და მის ადვოკატს. ოქმს ხელს აწერენ პროკურორი, ქონების მესაკუთრე და მისი ადვოკატი.

მუხლი 158². ქონების მიზნობრივი განკარგვის თაობაზე შუამდგომლობა და მისი განხილვის წესი

1. თუ პროკურორი, ქონების მესაკუთრე და მისი ადვოკატი ქონების მიზნობრივ განკარგვაზე შეთანხმდებიან, პროკურორი წერილობითი შუამდგომლობით მიმართავს სასამართლოს გამოძიების ადგილის მიხედვით.

2. პროკურორის შუამდგომლობას თან ერთვის ქონების მესაკუთრის წერილობითი განცხადება და სისხლის სამართლის საქმის იმ მასალების ასლები, რომლებიც აუცილებელია მისი განხილვისათვის. განცხადებაში დადასტურებული უნდა იყოს, რომ ქონების მესაკუთრემ ნებაყოფლობით განაცხადა განკარგვის თაობაზე და სრულყოფილად აღიქვამს მოსალოდნელ სამართლებრივ შედეგებს.

3. შუამდგომლობას ხელს აწერენ პროკურორი, ქონების მესაკუთრე და მისი ადვოკატი. შუამდგომლობას თან ერთვის ქონების მიზნობრივი განკარგვის ოქმი.

4. შუამდგომლობის განხილვისას სასამართლო საქმის მასალების საფუძველზე ამოწმებს, დასაბუთებულია თუ არა შუამდგომლობა, არსებობს თუ არა ამ კოდექსით გათვალისწინებული გარემოებები და არის თუ არა მოთხოვნა კანონიერი.

5. შუამდგომლობის განხილვისას სასამართლო ვალდებულია დარწმუნდეს, რომ ქონების მიზნობრივი განკარგვის გადაწყვეტილება:

ა) მიღებულია წამების, არაადამიანური ან დამამცირებელი მოპყრობის ან სხვაგვარი ძალადობის, დაშინების, მოტყუების ან რაიმე უკანონო დაპირების გარეშე;

ბ) ნებაყოფლობითია;

გ) ქონების მესაკუთრე სრულად აცნობიერებს მოსალოდნელ სამართლებრივ შედეგებს;

დ) ქონების მესაკუთრემ მიიღო კვალიფიციური იურიდიული დახმარება;

ე) შეთანხმება სრულად ასახავს მხარეთა შორის მიღწეული შეთანხმების ყველა პირობას.

6. მოსამართლე ვალდებულია ქონების მესაკუთრეს განუმარტოს, რომ მის მიერ წამების, არაადამიანური ან დამამცირებელი მოპყრობის ფაქტზე საჩივრის შეტანა ხელს არ შეუშლის კანონის დაცვით დადებული შეთანხმების აღსრულებას.

7. მოსამართლე შუამდგომლობას იხილავს ზეპირი მოსმენით, მიმართვიდან 72 საათის ვადაში და იღებს გადაწყვეტილებას შუამდგომლობის დაკმაყოფილებისა და ქონების მიზნობრივი განკარგვის ან დაკმაყოფილებაზე უარის თქმის შესახებ. შუამდგომლობის დაკმაყოფილებაზე უარი არ საჩივრდება, თუმცა არ ზღუდავს სასამართლოსთვის 3 თვის შემდეგ ხელახლა მიმართვის შესაძლებლობას.

8. სასამართლოს განჩინების სარეზოლუციო ნაწილში, სხვა აუცილებელ რეკვიზიტებთან ერთად, სავალდებულოდ უნდა მიეთითოს განსაკარგი ქონების მაიდენტიფიცირებელი ნიშნები და მოცულობა, ქონების მიმღები სუბიექტის

ვინაობა, გადაწყვეტილება ქონებაზე დადებული ყადაღის სრულად ან ნაწილობრივ მოხსნის თაობაზე.

მუხლი 158³. ქონების მიზნობრივი განკარგვის თაობაზე გადაწყვეტილების აღსრულება

სასამართლოს განჩინება ქონების მიზნობრივი განკარგვის თაობაზე შესასრულებლად სავალდებულოა აღსრულების უფლებამოსილების მქონე შესაბამისი დაწესებულებისა და სუბიექტისთვის. იგი ვალდებულია სასამართლოს განჩინება შემოსვლისთანავე, დაუყოვნებლივ აღასრულოს.

მუხლი 158⁴. დაყადაღებული მოძრავი ქონების კაპიტალიზაცია

1. თუ ბრალდებულის მოძრავ ქონებას შესაძლო ჩამორთმევის უზრუნველსაყოფად ყადაღა ადევს და იმავდროულად ქონების შენახვა იწვევს მისი ღირებულების მნიშვნელოვნად შემცირებას, პროკურორი უფლებამოსილია მოითხოვოს ქონების კაპიტალიზაცია, მისი აუქციონის წესით გასხვისების გზით.

2. ქონების კაპიტალიზაციისა და კაპიტალიზებულ ქონებაზე ყადაღის დადების შესახებ შუამდგომლობას გამოძიების ადგილის მიხედვით სასამართლო განიხილავს ამ კოდექსის 154-ე მუხლით დადგენილი წესით და იღებს გადაწყვეტილებას შუამდგომლობის დაკმაყოფილებისა და ქონების კაპიტალიზაციის და კაპიტალიზებულ ქონებაზე ყადაღის დადების შესახებ ან დაკმაყოფილებაზე უარის თქმის შესახებ. განჩინება საჩივრდება ამ კოდექსის 207-ე მუხლით დადგენილი წესით. განჩინების გასაჩივრება შეუძლიათ პროკურორს ან ბრალდებულს, აგრეთვე მის ადვოკატს. განჩინების გასაჩივრების ვადა აითვლება უფლებამოსილი პირისთვის მისი გადაცემის მომენტიდან.

3. პროკურორის შუამდგომლობას უნდა ერთვოდეს მოძრავი ქონების შეფასების დოკუმენტი.

4. შუამდგომლობის დაკმაყოფილების შემთხვევაში, გასაჩივრების ვადის გასვლის შემდგომ, განჩინება აღსასრულებლად ეგზავნება სსიპ ფინანსთა სამინისტროს მომსახურების სააგენტოს, რომელიც უზრუნველყოფს, საშუალო საბაზრო ფასის შესაბამისად, ქონების რეალიზაციას კანონმდებლობით დადგენილი წესით.

5. ქონების გასხვისების შედეგად მიღებული თანხა სისხლის სამართლის საქმეზე შემაჯამებელი გადაწყვეტილების მიღებამდე განთავსდება სსიპ ფინანსთა სამინისტროს მომსახურების სააგენტოს ანგარიშზე და ამის შესახებ ეცნობება პროკურორს.

6. დაყადაღებული ქონების კაპიტალიზაცია დაინტერესებულ პირს არ ართმევს უფლებას, სამოქალაქო სამართალწარმოების წესით იდავოს კაპიტალიზებულ ქონებაზე.

7. თუ ქონება გასხვისებულია და სისხლის სამართლის საქმეზე ისეთი შემაჯამებელი გადაწყვეტილება იქნა მიღებული, რომლითაც ბრალდებულს ეს ქონება არ უნდა ჩამორთმეოდა, ამ ქონების გასხვისების შედეგად ამონაგები თანხა ბრალდებულს გადაეცემა.“;

6. კოდექსს დაემატოს შემდეგი შინაარსის XVII¹ თავი:

„თავი XVII¹

დაზარალებულის კომპენსაცია

„მუხლი 165³. დაზარალებულის კომპენსაციის გადახდის საფუძველი

1. გამამტყუნებელი განაჩენით პირს დაზარალებულის კომპენსაციის გადახდის ვალდებულება ეკისრება თუ ერთდროულად არსებობს შემდეგი საფუძველები:

ა) მსჯავრდებული დამნაშავედ არის ცნობილი საქართველოს სისხლის სამართლის კოდექსის 180-ე მუხლის მესამე ნაწილის „ბ“ ქვეპუნქტით, 181-ე მუხლის მე-2 ნაწილის „გ“ ქვეპუნქტით, 182-ე მუხლის მე-3 ნაწილის „ბ“ ქვეპუნქტით, 185-ე მუხლის მე-3 ნაწილის „ბ“ ქვეპუნქტით, 187-ე მუხლით (თუ ზიანი აღემატება 10 000 ლარს), 205¹ მუხლის მე-3 ნაწილის „ბ“ ქვეპუნქტით, 220-ე მუხლით ან 286¹ მუხლის მე-3 ნაწილის „ბ“ ქვეპუნქტით გათვალისწინებული დანაშაულის ჩადენაში;

ბ) დაზარალებული წერილობით უარს არ აცხადებს მისთვის დაზარალებულის კომპენსაციის გადახდაზე.

2. ამ თავის მიზნებისთვის მსჯავრდებული განიმარტება, როგორც ამ მუხლის პირველი ნაწილის „ა“ ქვეპუნქტით გათვალისწინებული დანაშაულის ჩამდენი პირი.

3. ამ თავის გამოყენება არ ართმევს დაზარალებულს უფლებას დანაშაულის ჩადენის შედეგად მისთვის მიყენებული ზიანის ანაზღაურების შესახებ სამოქალაქო სამართალწარმოების წესით იდავოს.

4. ამ მუხლის მე-3 ნაწილით გათვალისწინებულ შემთხვევაში დაზარალებულს არ აქვს უფლება მისთვის მიყენებული ზიანის იმ ნაწილის ანაზღაურება მოითხოვოს, რომელიც მან ამ თავით დადგენილი წესით დაზარალებულის კომპენსაციის სახით მიიღო.

5. გამოძიებისა და სისხლის სამართლის საქმის სასამართლოს განხილვის ეტაპზე ბრალდების მხარე ყველა შესაძლებელ და გონივრულ ზომას მიმართავს დაზარალებულის კომპენსაციის გადახდის უზრუნველსაყოფად.

მუხლი 165⁴. დაზარალებულის კომპენსაციის გადახდის ვალდებულების დაკისრება

1. გამამტყუნებელი განაჩენით დაზარალებულის კომპენსაციის გადახდის ვალდებულება შემდეგი თანმიმდევრობით ეკისრება:

ა) მსჯავრდებულს მის საკუთრებაში არსებული ქონებიდან;

ბ) მსჯავრდებულის ახლო ნათესავს ან სხვა პირს მსჯავრდებულის იმ ქონებიდან, რომელიც მან მსჯავრდებულის მიერ ამ კოდექსის 165³ მუხლის პირველი ნაწილით გათვალისწინებული დანაშაულის ჩადენის შემდეგ ერთჯერადი ან მრავალჯერადი გადაცემის შედეგად უსასყიდლოდ ან საბაზრო ღირებულებაზე მნიშვნელოვნად დაბალ ფასად მიიღო, ხოლო თუ ეს ქონება საკმარისი არ არის დაზარალებულის კომპენსაციის გადასახდელად, მსჯავრდებულის ახლო ნათესავს ან ამ სხვა პირს დაზარალებულის კომპენსაციის გადახდის ვალდებულება ეკისრება მის საკუთრებაში არსებული იმ სხვა ქონებიდან, რომლის მიღებასთან დაკავშირებითაც ის დამნაშავედ არის ცნობილი საქართველოს სისხლის სამართლის კოდექსის 194-ე მუხლით გათვალისწინებული დანაშაულის ჩადენის გამო;

გ) მსჯავრდებულის ახლო ნათესავს ან სხვა პირს მსჯავრდებულის იმ ქონებიდან, რომელიც მან ერთჯერადი ან მრავალჯერადი გადაცემის შედეგად მსჯავრდებულის მიერ ამ კოდექსის 165³ მუხლის პირველი ნაწილით გათვალისწინებული დანაშაულის ჩადენამდე სასყიდლით, უსასყიდლოდ ან საბაზრო ღირებულებაზე მნიშვნელოვნად დაბალ ფასად ან ამავე დანაშაულის ჩადენის შემდეგ სასყიდლით მიიღო და თუ მსჯავრდებულის ახლო ნათესავი ან ეს სხვა პირი დამნაშავედ არის ცნობილი საქართველოს სისხლის სამართლის კოდექსის 194-ე მუხლით გათვალისწინებული დანაშაულის ჩადენის გამო;

დ) მსჯავრდებულის ახლო ნათესავს იმ ქონებიდან, რომლის მიღებასთან დაკავშირებითაც ის დამნაშავედ არის ცნობილი საქართველოს სისხლის სამართლის კოდექსის 194-ე მუხლით გათვალისწინებული დანაშაულის ჩადენის გამო;

ე) საქართველოს სისხლის სამართლის კოდექსის 381² მუხლის მე-2 ნაწილით გათვალისწინებული დანაშაულის ჩამდენ პირს იმავე ნაწილით გათვალისწინებული ქონებიდან და სატრანსპორტო საშუალებიდან.

2. ამ მუხლის პირველი ნაწილის „ა“ ქვეპუნქტით, ასევე „ბ“ ქვეპუნქტით (გარდა სისხლის სამართლის კოდექსის 194-ე მუხლით გათვალისწინებული დანაშაულის ჩადენასთან დაკავშირებით პირის დამნაშავედ ცნობის ნაწილისა) განსაზღვრულ შემთხვევებში დაზარალებულის კომპენსაციის გადახდა ხორციელდება მსჯავრდებულის მიმართ გამოტანილი განაჩენის საფუძველზე.

3. ამ მუხლის პირველი ნაწილის „გ“ და „დ“ ქვეპუნქტებით, ასევე „ბ“ ქვეპუნქტით (სისხლის სამართლის კოდექსის 194-ე მუხლით გათვალისწინებული დანაშაულის ჩადენასთან დაკავშირებით პირის დამნაშავედ ცნობის ნაწილში) გათვალისწინებულ შემთხვევებში დაზარალებულის კომპენსაციის გადახდა

ხორციელდება იმავე ქვეპუნქტებით განსაზღვრული პირისა და მსჯავრდებულის ახლო ნათესავის მიმართ გამოტანილი განაჩენის საფუძველზე.

4. ამ მუხლის პირველი ნაწილის „ე“ ქვეპუნქტით გათვალისწინებულ შემთხვევაში დაზარალებულის კომპენსაციის გადახდა ხორციელდება იმავე ქვეპუნქტით განსაზღვრული დანაშაულის ჩადენისთვის მსჯავრდებულის მიმართ გამოტანილი განაჩენის საფუძველზე.

5. მსჯავრდებულისა და ამ მუხლის პირველი ნაწილით გათვალისწინებული პირის სახელით ან მათ სასარგებლოდ დაზარალებულის კომპენსაცია მთლიანად ან ნაწილობრივ შეიძლება ნებისმიერმა პირმა გადაიხადოს. თუ ამ პირმა დაზარალებულის კომპენსაციის ნაწილი გადაიხადა, მის მიერ გადახდილი კომპენსაციის ეს ნაწილი დაზარალებულის კომპენსაციაში ჩაითვლება.

მუხლი 165⁵. დაზარალებულის კომპენსაციის გადახდის უზრუნველყოფის ღონისძიებები

დაზარალებულის კომპენსაციის გადახდის უზრუნველყოფის ღონისძიებები:

- ა) ყადაღის დადება იმ ქონებაზე, რომლითაც ამ თავის შესაბამისად დაზარალებულის კომპენსაცია უნდა იქნეს გადახდილი;
- ბ) მსჯავრდებულისთვის საქართველოდან გასვლის აკრძალვა.

მუხლი 165⁶. ქონებაზე ყადაღის დადება

1. თუ დაზარალებული წერილობით უარს არ აცხადებს მისთვის დაზარალებულის კომპენსაციის გადახდაზე, დაზარალებულის კომპენსაციის გადახდის უზრუნველყოფის მიზნით ყადაღა ედება ამ კოდექსის 165⁴ მუხლით გათვალისწინებულ შესაბამის ქონებას.

2. შესაბამის ქონებას ყადაღა დაზარალებულისთვის მიყენებული ზიანის პროპორციულად უნდა დაედოს.

მუხლი 165⁷. მსჯავრდებულისთვის საქართველოდან გასვლის აკრძალვა

1. გამამტყუნებელი განაჩენით შესაბამის მსჯავრდებულს საქართველოდან გასვლა აკრძალება თუ ერთდროულად არსებობს შემდეგი საფუძველები:

ა) მსჯავრდებული დამნაშავედ არის ცნობილი საქართველოს სისხლის სამართლის კოდექსის 180-ე მუხლის მესამე ნაწილის „ბ“ ქვეპუნქტით, 181-ე მუხლის მე-2 ნაწილის „გ“ ქვეპუნქტით, 182-ე მუხლის მე-3 ნაწილის „ბ“ ქვეპუნქტით, 185-ე მუხლის მე-3 ნაწილის „ბ“ ქვეპუნქტით, 187-ე მუხლით (თუ ზიანი აღემატება 10 000 ლარს), 205¹ მუხლის მე-3 ნაწილის „ბ“ ქვეპუნქტით, 220-ე მუხლით ან 286¹ მუხლის მე-3 ნაწილის „ბ“ ქვეპუნქტით გათვალისწინებული დანაშაულის ჩადენაში;

ბ) მსჯავრდებული საქართველოს მოქალაქეობის მქონე ან საქართველოში სტატუსის მქონე მოქალაქეობის არმქონე პირია;

გ) დაზარალებული წერილობით უარს არ აცხადებს, რომ დაზარალებულის კომპენსაციის გადახდის უზრუნველსაყოფად მსჯავრდებულს საქართველოდან გასვლა აეკრძალოს.

2. შესაბამის მსჯავრდებულს საქართველოდან გასვლა ეკრძალება მის მიერ ჩადენილი შესაბამისი დანაშაულისთვის დადგენილი ნასამართლობის გაქარწყლების ორმაგი ვადით.

3. საქართველოდან გასვლის აკრძალვის ვადა გამოიანგარიშება:

ა) სასჯელის სახით შინაპატიმრობის ან თავისუფლების აღკვეთის შეფარდების შემთხვევაში, მისი მოხდის მომენტიდან;

ბ) პირობითი მსჯავრის შემთხვევაში ან არასაპატიმრო სასჯელის შეფარდების შემთხვევაში, განაჩენის გამოტანის მომენტიდან;

გ) საქართველოს სისხლის სამართლის კოდექსის 50-ე მუხლის მე-5 ნაწილით გათვალისწინებულ შემთხვევაში, მოსახდელად განსაზღვრული სასჯელის მოხდის მომენტიდან;

დ) საქართველოს სისხლის სამართლის კოდექსის 72-ე და 73-ე მუხლებით გათვალისწინებულ შემთხვევაში, პირობით ვადამდე გათავისუფლების და სასჯელის მოუხდელი ნაწილის უფრო მსუბუქი სახის სასჯელით შეცვლის მომენტიდან.

4. საქართველოდან გასვლის აკრძალვის აღსრულების მონიტორინგს ელექტრონული ზედამხედველობის საშუალებით ახორციელებს დანაშაულის პრევენციის, არასაპატიმრო სასჯელთა აღსრულებისა და პრობაციის ეროვნული სააგენტო.

მუხლი 165⁸. საქართველოდან გასვლის აკრძალვის გაუქმება

1. საქართველოდან გასვლის აკრძალვა უქმდება თუ მსჯავრდებულმა გადაიხადა დაზარალებულის კომპენსაცია ან დაზარალებული წერილობით უარს აცხადებს დაზარალებულის კომპენსაციაზე.

2. თუ საქართველოდან გასვლის აკრძალვის გაუქმების ამ მუხლის პირველი ნაწილით გათვალისწინებული საფუძველი სასამართლოში საქმის განხილვის ეტაპზე გამოვლინდა, საქართველოდან გასვლის აკრძალვას აუქმებს სასამართლო, ხოლო თუ აღნიშნული საფუძველი სამართალწარმოების დასრულების შემდეგ გამოვლინდა, საქართველოდან გასვლის აკრძალვა ამ კოდექსის XXVII თავით დადგენილი წესით უქმდება.“;

7. 260-ე მუხლის პირველ ნაწილს დაემატოს შემდეგი შინაარსის „ზ¹“ ქვეპუნქტი:

„ზ¹) დაზარალებულის კომპენსაციის გადახდის დაკისრება და საქართველოდან გასვლის აკრძალვის ღონისძიების გამოყენება;

8. 273-ე მუხლი ჩამოყალიბდეს შემდეგი რედაქციით:

„მუხლი 273. გამამტყუნებელი განაჩენის აღწერილობით-სამოტივაციო ნაწილი

1. გამამტყუნებელი განაჩენის აღწერილობით-სამოტივაციო ნაწილი უნდა შეიცავდეს იმ დანაშაულებრივი ქმედების აღწერას, რომელიც სასამართლომ დადგენილად ცნო. ამასთანავე, განაჩენში მითითებული უნდა იყოს მისი ჩადენის ადგილი, დრო და ხერხი, ბრალის ფორმა, დანაშაულის მოტივი, მიზანი და შედეგი. განაჩენში მითითებული უნდა იყოს აგრეთვე მტკიცებულება, რომელსაც ემყარება სასამართლოს დასკვნა, და მოტივი, რომლის მიხედვითაც სასამართლომ მიიღო ერთი მტკიცებულება და უარყო მეორე. ამასთანავე, განაჩენში აღნიშნული უნდა იყოს პასუხისმგებლობის შემამსუბუქებელი ან დამამძიმებელი გარემოებები, ხოლო თუ ბრალდების ნაწილი უსაფუძვლოდაა მიჩნეული ან დანაშაულის კვალიფიკაცია არასწორია – ბრალდების ბრალდებულის სასარგებლოდ შეცვლის საფუძველი და მოტივები. განაჩენში მითითებული უნდა იყოს დაზარალებულის კომპენსაციის გადახდის დაკისრებისა და მისი გადახდის უზრუნველსაყოფად საქართველოდან გასვლის ღონისძიების გამოყენების საფუძველი და მოტივები. განაჩენში აღნიშნული უნდა იყოს აგრეთვე სამართლებრივი შეფასება და კანონები, რომლებითაც სასამართლო ხელმძღვანელობდა. განაჩენში შეიძლება მითითებული იყოს აგრეთვე ადამიანის უფლებათა და ძირითად თავისუფლებათა დაცვის კონვენციისა და მისი დამატებითი ოქმების ნორმები და მსგავს სამართლებრივ საკითხზე ადამიანის უფლებათა ევროპული სასამართლოს პრეცედენტები, რომლებითაც სასამართლო ხელმძღვანელობდა.

2. სასამართლო ვალდებულია დაასაბუთოს აგრეთვე სასჯელის სახე და ზომა, პირობითი მსჯავრის გამოყენება, შესაბამისი დანაშაულისთვის საქართველოს სისხლის სამართლის კოდექსით გათვალისწინებულ მინიმალურ ზღვარზე დაბალი სასჯელის დანიშვნა და ნაკლებად მკაცრ სასჯელზე გადასვლა, ნარკომანიით დაავადებული პირის სავალდებულო მკურნალობის დანიშვნა, დაზარალებულის კომპენსაციის გადახდის დაკისრებისა და მისი გადახდის უზრუნველყოფად საქართველოდან გასვლის აკრძალვის ღონისძიების გამოყენების, საპროცესო იძულების ღონისძიების გაუქმების ან შემდგომი გამოყენების შესახებ გადაწყვეტილება.“;

9. 274-ე მუხლის:

ა) პირველი ნაწილის „ი“ ქვეპუნქტის შემდეგ დაემატოს შემდეგი შინაარსის „ი¹“ ქვეპუნქტი:

„ი¹) გადაწყვეტილება დაზარალებულის კომპენსაციის გადახდის დაკისრების, ასევე მისი გადახდის უზრუნველყოფად საქართველოდან გასვლის აკრძალვის ღონისძიების გამოყენების შესახებ;“;

ბ) მე-4 ნაწილის შემდეგ დამატოს შემდეგი შინაარსის მე-5 ნაწილი:

„5. გამამტყუნებელ განაჩენის სარეზოლუციო ნაწილში უნდა მიეთითოს დაზარალებულის კომპენსაციის ოდენობა, ქონება რომლითაც უნდა მოხდეს დაზარალებულის კომპენსაციის გადახდა, ასევე ყველა ის ინფორმაცია, რაც აუცილებელია დაზარალებულის კომპენსაციის გადახდის „სააღსრულებო წარმოებათა შესახებ“ საქართველოს კანონით დადგენილი წესით ჯეროვნად აღსასრულებლად.“;

10. 310-ე მუხლის დამატოს შემდეგი შინაარსის „ი“ ქვეპუნქტი:

„ი) წარდგენილია მტკიცებულება ამ კოდექსის 291⁶ მუხლის პირველი ნაწილით გათვალისწინებული საფუძვლის არსებობის შესახებ.“.

მუხლი 2.

1. ბრალდების მხარემ ყველა შესაძლებელ და გონივრულ ღონისძიებას უნდა მიმართოს ამ კანონით გათვალისწინებული შესაბამისი ქონების გამოსავლენად იმ სისხლის სამართლის საქმეზე, რომელიც ამ კანონის ამოქმედების მომენტისთვის სასამართლოს განსახილველად ჯერ არ გადასცემია ან ამ კანონის ამოქმედების მომენტისთვის სასამართლოსთვის არის გადაცემული და პირველი ან მეორე ინსტანციის სასამართლოში განხილვის ეტაპზეა.

2. ამ კანონით გათვალისწინებული ქონების გამოვლენის შემდეგ, შესაბამისი სამართლებრივი საფუძვლის არსებობის შემთხვევაში, ბრალდების მხარე ვალდებულია შუამდგომლობით მიმართოს სასამართლოს ამ ქონებაზე ყადაღის დასადებად იმ სისხლის სამართლის საქმეზე, რომელიც ამ კანონის ამოქმედების მომენტისთვის სასამართლოს განსახილველად ჯერ არ გადასცემია ან ამ კანონის ამოქმედების მომენტისთვის სასამართლოსთვის არის გადაცემული და პირველი ან მეორე ინსტანციის სასამართლოში განხილვის ეტაპზეა.

3. დაზარალებულის კომპენსაციის გადახდის უზრუნველყოფის მიზნით, შესაბამისი სამართლებრივი საფუძვლის არსებობის შემთხვევაში, სასამართლო ვალდებულია ბრალდების მხარის შუამდგომლობის საფუძველზე ყადაღა დაადოს ამ კანონით გათვალისწინებულ ქონებას იმ სისხლის სამართლის საქმეზე, რომელიც ამ კანონის ამოქმედების მომენტისთვის სასამართლოს განსახილველად ჯერ არ გადასცემია ან ამ კანონის ამოქმედების მომენტისთვის სასამართლოსთვის არის გადაცემული და პირველი ან მეორე ინსტანციის სასამართლოში განხილვის ეტაპზეა.

4. შესაბამისი სამართლებრივი საფუძვლის არსებობის შემთხვევაში, სასამართლო ვალდებულია დაზარალებულის კომპენსაციის გადახდა დააკისროს საქართველოს სისხლის სამართლის საპროცესო კოდექსის 165³ მუხლით გათვალისწინებული პირის ქონებას იმ სისხლის სამართლის საქმეზე, რომელიც ამ კანონის ამოქმედების მომენტისთვის სასამართლოს განსახილველად ჯერ არ

გადასცემია ან ამ კანონის ამოქმედების მომენტისთვის სასამართლოსთვის არის გადაცემული და პირველი ან მეორე ინსტანციის სასამართლოში განხილვის ეტაპზეა.

მუხლი 3. ეს კანონი ამოქმედდეს გამოქვეყნებიდან მე-15 დღეს.

საქართველოს პრეზიდენტი

მიხეილ ყაველაშვილი